

FENETA

TA HINKA

AÑA 1, No. 2

— Imprimi : Tip. Excelsior —

OKTOBER 1969

INTRODUKSHON

Redakshon di Feneta a haña hopi kritika tokante di nos ortografia (manera di skirbi e palabranan).

Otro byaha nos lo duna un eksplikashon tokante e ortografia.

Un remarka so nos kyer hasi e byaha aki. Esey ta ku tabata tin hopi hende ku tabata tin oportunitat pa bay syerto charlanan na Aruba tokante di Papyamento.

Kisas nan a sinti nan muchu bon pa e kosnan ey. Awor ta nèt nan ta skupi kandela ariba e ortografia nobo. Nos no tin nada kontra di nan kritika. Uniko kos nos ta pidi pweblo ta :

Buska semper pa haña sa pakiko un otro ta pensa otro. Ora nos a aserka poko di e hendenan ku kritika tokante e ortografia pa nos komersá i diskuti ku nan, hopi a bira emoshoná i asta kuminsa insultá.

Nos no ta wòri. Ta hopi interesante pa haña sa unda e rais di e emoshon aki ta.

Hopi hende a puntra ta ki sorto di ideologia nos ta sigi.

Nan no por spera ku hobenan ku kyer kambyo positivo pa nos komunidat lo pensa den terminonan antigwo.

Nos ta traha den ramo sosyal izkyerdista. Tur kos ku tin deber ku pweblo i kon por trese informashon bon na pweblo.

Tin hopi hende den pweblo ku ta gusta kos rebelde, pero djis pa hari i gosa kon ta krak un otro hende of un sistema. Artikulonnan rebelde o revolushonario di nos banda ta solament e pa yuda trese otro pensamiento y aktitut pa un kambyo pa Antiyas.

Tur hende tin su moda di skirbi pa trese un kos na klaridat. Si boso no ta di akwerto ku nos, esey ta un bon desafio pa boso djis tuma e molèster di skirbi nos. I si bo no tin e posibilidat di skirbi, bèl nos.

Ningun hende no ta kome bo ni mata bo pasobra bo tin un otro opinyon ku di dje. Al kontrario e ora ey ta interesante pa sa di kon nos por ta pensa otro.

Poko hende ta puntra nan mes di ki partido nos ta.

Nos no ta propagandá ningun partido. Nos ta keda ku libertat di duna kritika, boso mester sa ku tur kos, tur hende, tur partido tin su banda bon i su banda menos bon i hasta malo.

Klaro, ta hende nos tur ta. I pesey nos tey pa observa tur kos i duna nos komentaryo. Abo tambe.

FENETA TA HINKA

— Bo a chèk bon kaba si bo ta Rubyano?

— Wak bo fam bon si e ta fam di Indyan!

— Maske makako bisti saya, makako é ta keda.

— Maske un negro strika su kabey, negro e ta keda.

— Den nos lucha Arubano nos mester di nos mes un Obispo Arubano, ku su dyosexis na Aruba mes.

— Preysvrag :
"Kende ta netamente Arubano?"

— Ruku ta fuku.

— 30 di mei: Free for all-(day).

— 5 di september: "hopi huma sin kandela".

— Nos tin Wilhelmina Stadion, Wilhelmina Park i pronto nos lo haya "Wilhelmina Teen-beat-tent".

— Un maestro a kore drenta un klas hisa Feneta benta i di ku un alumno "Hier, ik lees deze rotzooi niet, het is geen kwartje waard."

Pober maestro, ni bisa e no a bisa kiko ta e motibo, ku e a haña Feneta "rotzooi". Un maestro mester siña su alumnonan pakiko un kos ta malo. Pa kolmo e ta Antiyano tambe.

Redakshon.

REDAKSHON DI FENETA

Francisco Sprott,
Francisco Celaire,
Raymundo Janga,
Ramón Todd Dandaré
Joyce Pereira,
Juanita de Cuba,
Lay-Out: Adi Martis

Administrashon di Feneta:

Patiestraat 44
Dakota,
A R U B A .

Un pweblo ku ta disidí di goberná su mes ta un pweblo ku ta dispuesto na kritiká su mes i na organisá su mes.

NOS HUBENTUT MESTER DI MAS POSIBILIDAT PA ENTRETENE SU MES.

Nos a ser informá, tanto pa parti di korant komo pa parti di varyos observador, ku djadomingu atardi dia 28 di september último pasá, lugá di e "happening" ku mestér a tuma lugá den Wilhelmína Park, e muchanan a bisti Lareyna un sombré mane Joe Cowboy, i sinta kanta rond di dje, meskós ku ta adorá nan ta adorá un Dyos òf un ídolo. Lástimamente pa e muchanan, ni e bit-bentnan no a trese nan instrument, ni e "sing-in", no por a wordu sigí, komo ku Santa Hermandat (es desir POLIS) a disidí di manda tur hende kas, i nan a konfiská tres gitara.

Pa lo kwal pronto nos spera di tende "Trio Tirahende".

E echo ku e muchanan a bisti Lareyna e sombré ta di komprondé, komo e pobersito ta pará dia 'den, dia 'fó den e solo kayente ku últimamente ta hasi te hasta e muchanan un poco iritá. Tabatá mas o menos un obra di karidat. Lo ku si no ta un obra di karidat ta e echo ku polis ta yega manda tur hende kas, mané ku esey ta drecha algo den e situa-

shon di e hubentut més. Pasó un eho ta tambe, i ta wordu demostrea dor di e akontesimiyento aki, ku nos hubentut no sa ta kiko e mester hasi den wiként ora ku nan no tin nesidat di bay skol. Komokiyera ku Gobyerno ta "traha" dura pa drecha situwashon sosyal i ekonómiko, trahando yen di Hotel pa e merikanonan por kuma nan kurpa riba nos "beecnan tanto bunita, dunando nan chèns pa por hunga nan plaká anochi den Casino (e plaka aki ta bolbe bay Merka bèk) i pa nan por balya den "Club Dyablo" òf "Club Dyos", nan ta lubidá di organisá syerto posibilidat pa nos hubentut i nos mes hendenan tambe. I si akaso bo purba pidi "vergunning", pa organisá fyesta pa hubentut, bo no ta hayé. Pa kwá motibu nos no por haya "vergunning" pa e aktividatnan aki, nos no sá. Ta di més masha lóhiko,

NA NOS NEGOSYANTENAN KRISTYAN I HUDIO : "Stima bo próhimo mané bo més" PARTI BO GANÁSHI KU BO TRAHADONAN !!!

ku muchanan ku ta na skól durante 30 a 35 ora pa simán i ku despues mester traha na nan kas pa varyos ora mas tur dia, mestér di un tiki deskanso i un tiki entretenimiyento den wiként. Pero si nan no tin e posibilidat di hasi esaki dor di ademas di Sport, nan por ekspresá nan més den nan propyo ambyente, dor di por ehempel por kanta, balya, traha "ko'i loko" pa nan més, òf bay un bon siní òf pyesa di teatro, no ta keda nan otro kos di hasi ku "-hang around" den kaya, buska algo di hasi ku ta atrae tur hende, i mayoria di byaha, esaki ta bira algu ku ta trese nan den kontakto ku polis, dor di esey nan ta haya tróbel na kas, esaki ta molestiá nan tanto, ku nan no por haya nan més bèk, i dor di lokwal nan no por studia, nan ta bira indifereente, nan ta pérdè nan aña di skol, i esún ku ta bira víktima di tur esaki ta é mes. Ta parse nos ku hubentut riba su més no ta un problema, e problema más grandi

ta, ta kon bo ta dirihí hubentut den un bon direkshón ora nan ta fo'i skol i fo'i kas. P'esaki, nos ta kere ku di parti di instanshanan ofisial mestér wordu hasi más, por ehempel nombramiyento di un Komisyon kwal mestér studya ki situwashon nan por krea, pa hubentut por pasa su rato agradabel, meskos ku e turistanan ta pasé na e hotelnan merikano ku nos tin riba nos isla. Gobyerno por wèl sigi traha yen di kos pa drecha e situwashon sosyal, pero si sorto di kosnan asina 'ki ku ta masha esensyal, wordu lubidá, anto nos situwashon sosyal no ta drecha òl. Nos no mestér lubidá, ku algo más di 50% di nos poblashon tin menos di 20 aña. Nos pweblo ta un pweblo hoben, i hubentut tambe tin nesidat di "bida". Nos ta proponé pa bin lo más pronto posibel: un lugá, kaminda tur djasabara atardi i djadomingu merdia i atardi hubentut por bay, kanta, balya riba nan mes músika, duna nan opinyon riba diferente kos ku ta pasa, etc. Además nos ta pidi e komersyantenan kapitalista ku nos tin den Caya Grandi, pa hinka kabés den otro i traha un klub di bit, kaminda e muchanan por bay balya tur djasabara anochi i djadomingu té 11 o 12 or.

E kos aki mestér bira un kos barata sí, e komersyantenan ku ta dispuesto pa hasi esaki (ku ayudo di Gobyerno), mestér ta dispwesto tambe pa lebumay ganamento di plaka i yuda nos hubentut. Otro kos ku por wordu hasi, ta ku Gobyerno más ta traha esaki i rënd é mes. E ora ey, hopi hende ku ta kava sin trabow awor aki, por yega na trabow tambe. Nos ta duna algún proposishon pa lo ku Gobyerno òf otro instanshanan por hasi, pa drecha situwashon sosyal di nos hubentut, anke nos ta komprondé tambe, ku esaki tin más difikultat ku loke ku nos ta kere. Esakí, den ningún kaso, mestér bira un inkonvenyente pa kuminsá masha lihé ku studyamento di e posibilidatnan di trabow. Nos hubentut mestér keda sano, e mestér keda hoben i e mestér por bay dilanti dor di habrimiyento di posibilidatnan pa nan por pasa nan tempo, fuera

di ser myembro di kwalke klub di sport, etc.: I esaki ta loke nos hubentut ké aworakí méis. Myentras más lihé, mihó. Si nos no ké pa nos yunan bira hendenan indiferente, sin amor pa nada i ku rabya riba tur hende, nos mestér purba yega na un kontentamentu di nan tambe. Gobyernu, hasi trabow di esaki!

Si akaso tin algun persona ku ké bisa algo ófer di lo ke ku por wordu hasi, óf si tin algún komersyante ku ta wòri pa algo más ku pa gana plaka só, anto laga skirbi nos lo más pronto posibel, pa nos duna publikashón na esaki. Nos hubentut ta nos futuro, i nos futuro mestér bira bon, p'esey :
YUDA HUBENTUT.

"DI KON"

A LUBIDA ALGUN KOS.

Den e ehemplar di e revista "Di Kon" nos por a lesa poko kritika o komentario masha bon pensá mes rònt di e eksplshon di 50 di mei 1969.

Den e komentario nos ta lesa entre otro ku un obrero tin mestér di bon leyman sosyal riba asuntunan di trabow i tambe ku e obrero mestér di su pan di kada dia si e haña un entrada adekwado pa su familia. Nos ta laga di menta e otro bon komentaryonan den "Di Kon" pero nos kyer a pone un poko mas bista riba e pan di kada dia pa familia di e obrero.

Masha kontento lo nos tabata pa tende algo tokante di e echo sosyal aki loke ta :

Yunan sin tata o yunan d'afó i tambe yunan ku nan tata a bay laga nan mama, i ku ta sin e kwido di tata, mentalmente i finansyeramente.

Hopi byaha nos ta ripara ku den komunidad nos ta lubida ku tin hopi problema i miserya pa motibo ku un kas di familia no ta completo.

Nos tur sabi pa un bon edukashon di muchanan tin nesidad di un bon lugá di bida i bon promimo pa gia i kwida nan. Fwera di esey pan di kada dia tambe ta pa esnan ku ta kay bow responsabilidad di esunan ku a pone e yunan na mundo.

Dirksz Lumber Yard

BERNHARDSTRAAT 106 SAN NICOLAS
TA E ADRES PA BO MATERYALNAN DI KONSTRUKSHON
E FERF KU A HACI PUROR RIBA MERKADO

TA :

"RADAR PAINT"

Un bon obrero, no maske ku e ta bon trahadó i e tin un bon entrada no ta un bon humano, ku e lubida su responsabilidad di tata "Homber di palabra ku ta korda konsekwensyanan di un echo".

Kwanto di nos faminan na 'Rubia i na Korsow no ta sufrí di miserya pa motibo di fayó di e tatanan obrefó ku ta buska nan mes bon so. Kon hopi byaha instan-syanan di gobyerno tin di intermete pa muestra hombenan sano riba nan responsabilidad? Ta kasi imposibel pa pone na sifra kwantó tata di yu no ta prekupa su mes ku loke e a pone den mundo.

E mesun muchanan aki ku lo lanta den un sitwashon deplorable ku kizás lo siña hasi malo promé ku e tabatin e oportunitad pa por a bay skol, pasobra no tin plaka pa kumpra paña o cuminda nesesario pa e muchanan aki.

Asina nos ta mira ku obreronan mes, pa via di nan mesun deskwido o falta di responsabilidad pa nan mes un yu, ta kowsa ku e yunan aki ta bira un obrero sin ofishi o sin enseñansa ku pa e por gana su pan despues e tin di wanta hopi koi chambon di hopi dunadó di trabow. Kisas e hobennan aki ta yega na man di polis prome ku nan haña un chens pa por ta produktivo pa komunidad.

E obrero mestér mira ta kiko e ta karga den su konsenshi ora ku e no ta kumpli ku su debér di kas o di su yu.

Lo ta importante pa laga e obrero sa ku e méis por dañá asunto pa su mes kompinchinan ku ta bini despues di dje o kizas ta un obrero ku né kaba.

Responsabilidad den trahamento di yu pa loko, sin pensa ta kon ta dunanan di kome tambe ta un di e obhetonan ku nos tin di tene na konsiderashon.

Den nos tempo tin bastante moda di preveni nasemento di yu, ku nos no por duna di kome. Awor nos ta pensa tokante e palabra "Famya Plaña" i tur e otro metodonañ preventibo. Te aki nos kier a komenta riba "Di Kon".

GOBYERNO TA KORDA ARIBA SU EMPELEADONAN SO !!!

Den prinsipyo di e aña aki (1969) trahadornan di Gobyerno a haña un "revishon" di sweldo. Mi ta bisa "revishon" pasobra no ta un owmento pa tur e tabata, esta pa esnan ku tabata gana un bon salario kaba. Pero di esey mi no kyer sigi papaya awor, ma mas tanto pa esun ku no ta traha pa gobyerno.

Foi prinsipyo kaba tur trahado di gobyerno ta haña, fwera di su sweldo, un algo ekstra pa su yu, esta "Kinderbijslag". Ta straño ku nunca otro obreronan di otro sektornan no a purba pa por a haña e entrada aki pa nan yunan tambe. Nan tambe ta paga impwesto meskos ku e trahadornan di gobyerno.

Parse ku nan yunan ta menos ku un yu di e trahado di gobyerno, ku ya tabata tin un miho sweldo i hiho posibilidad sosyal manera papé di dokter pa henter su familia, loke ku e obrero no tin.

Den e kambiyamento di sweldo di e "ambtenaarnan" gobyerno a kambya tambe e areglo di "Kin-

derbijslag", na moda di awor, esunnan ku nan entrada ta mas halto, ta haña mas plaka pa sa yu. Kipará bon, nèt esun ku ta gana mas i ku por hasi mas pa sa yu ku su entrada, ta nèt é ta haña mas pa sa yu. Pasobra sa yu tin mas hopi mester ku e yu di esun ku tin un sweldo abow?

E kos mas strano den e asunto aki ta, ku nos komunidat ta akseptá kosnan asina. Ku myembroman di Staten no ta bisa ni un palabra pa drecha e asunto aki.

Ta bira tempo pa tur obrero, den ki sektor ku e ta traha, haña e derecho di Kinderbijslag, segun nos sabi, te awor na 'Ruba aki, ta Elmar ta e uniko firma ku ta duna su trahadornan e fasilidat ey pa sa yu.

Tambe mester buska un solushon pa e inhustisia ku esun ku ta gana mas ta haña mas kinderbijslag.

Ta bira ora pa nos representantenan den goberno habri nan wewo pa kosnan manera esakinan.

A.O.V. — PENSION DI BEHÉS

Hendenan ku no por ta mas den e proseso di trabow den un komunidat, tin mester di leyman scsyal pa duna nan siguridat di bida.

Un di e gruponan aki ta nos byewnan ku no tin moda di traha pa gana nan mesun pan.

Aki na Antiyas nos a adapta un ley ku nos ta yama A.O.V., esey ta penshon di behés. Esey ta masha bunita mes pero ora ku nos hasi un kos bon, kabé bon tambe, pero no manera a kaba ku nos byewnan pa pone kere ku nan por biba di f 55.— so pa luna o si nan ta pareha nan ta haña f 95.— pa luna.

Tristo e kos aki ta! Manera ku nos ta duna e hendenan aki nèt basta pa nan sufri i no muri. Mi ta komprende ku nos por duna yunan o famia di nos byewnan di kompromé ku nan tin un syerto responsabilidat pa nan prohomonan, pero den nos tempo, ku pa tur hende biba ta duro, nos no por hasi kos mas duro pa esnan responsabel pa nos byewnan.

Fwera di esey nos ta ripara ku

tin un otro inhustisia den e ley di A.O.V. aki. Syerto gruponan ku entrada ku pa poko, ta dyes (10) bes mas ku un otro, ta paga e mesun kantidat di A.O.V. pa luna.

Laga bisa ku un hende ta gana f 500.— pa luna, un ku ta gana f 5000.— pa luna ta paga e mesun f 22.50 pa luna.

No, nos mester bisa ku ta f 12.50 so, tur dos partida ta paga, pero goberno ta pone pa tur dos f 10.— aserka.

Bisa mi ku no tin algo di inhustisia den e ley aki. Hendenan habri wewo i pidi nos representantenan den goberno pa buska di drecha e asuntonan aki pa nos.

 NA NOS NEGOSYANTENAN
 KRISTYAN I HUDIO :
 "Stima bo próhimo mané bo més"
 PARTI BO GANASHI KU BO
 TRAHADONAN !!

MYEDO DI KRITIKA

Laga nos mira promé kiko e palabra kyer men. Kritika ta un palabra di origen Gryego ku ta nifiká "parti".

Es desir parti un kos den dos; su banda bon i su banda malo.

Un di e kosnan prinsipal den e partimento aki ta, ku abo mester sa pakiko un parti ta kualifiká bon, anto e otro parti ta wordu kualifiká malo.

Mi ta duna un ehempel pa akklará kiko nos kyer men.

"Pedro ta trahadon un stul yen di doló. Frido, un otro amigo ku ta karpinté ta bin para mira kon Pedro ta mór. Frido sa kon ta traha stul. Pesey e por mira ku Pedro no ta trahadon e stul bon. E ta kritiká e trahamento ey di Pedro.

Awor nos ta spera mesora ku Frido lo bisa kon Pedro mester kambya su trabow of por sigi pa drecha of kon kaba ku e stul na un manera bon i adekwado".

Di e sitwashon tokante lokwal nos a kaba di komentá nos por saka entre otro e sigyente konklusjon :

a. Esun ku ta kritiká mester sa tokante kiko e ta papya. E no

mester bay hasi buya barata.

b. Esun ku ta kritiká mester por distingui si un kos ta bon of malo i kon e por mihor'é

c. Esun ku ta kritiká no ta para bisa Pedro ku e stul no ta sirbi i ku e mester bente na domp. E no ta bisa hisa e por-kerya ey benta afó.

d. Esun ku ta kritiká ta duna su opinyon of ta purba di splika kon e kos mester tá. E ta duna motibonan i pakikunan pa drecha e kwenta.

Laga nos wak kritika un tiki mas amplyo awor.

Kritika ta yuda un luga bay dilanti. Si tin hende ku sa of ku ta kere of ta pensa ku e sa un kos mihó, anto semper e mester habri su boka of pone man na obra pa drecha of kambya un kos.

Un komunidat ku no tin kritika ta un komunidat morto, bashi, atrasá, sin sows. Di kon ?

Pasobra den e tera ey tur hende ta traha stul fróko fróko i e karpinté, cu sa mihó ta para wak kon otro ta dañe e kwenta i e karpinté no ta habri su boka. Esey ta bon ?

Hopi byaha nos ta haña ku ta pa parti di mayornan ku nan yunan ta lanta sin e posibilidat pa por hasi uso di kritika. Di chikito kaba ora ku un mucha kyer dana su opinyon o kyer papya bisa algo pa su mës, nos ta tende mayornan ta para nan ku e palabranan aki: "Ora hende grandi ta papya, muchanan ta bay hunga of sera boka i orea". Of nan ta bisa ku e mucha ta sin manera, ora ku e habri su boka pa defendé su mes. Ta natural ku e muchanan aki ta lanta sin modo di por papya algo drechi riba asuntonan di bida. Esey nos ta ripará den hopi kos. Hopi hóben di aw'n dia ta byew kaba. Nan no tin e forza pa kibra e kadena ku tin nan mará. Nan no tin balenteria. Nan no ta ripará kon e sitwashon ta i pesey nada no ta kambya den e komunidat.

Tur nan energia nan ta skonde den skochi di mama. Asina aki nos tin un grupo di hóbenan ku ta

poko pòpchi frustiyá. Ay dyos ko-roto, si bo kyer kritiká nan, e ora ey nan ta bira bo enemigo te na fyerno.

Segun un dama hopi sabí, i ku un bista fantástiko di nos sitwasyon, a kontá nos:

"No kritiká Antiyano pasobra bo ta kibra tur e fundeshi wabi wabi ariba lokwal nan ta pará. I nan no tin e spírito pa bolbe pone un mihó fundeshi ku ta duro duro".

Loke ta mas tristí to : nos tin myedo, myedo, myedo di duna otro kritiká.

Si bo ta **mi amigo**, mi no ta kritiká bo. Mí tin myedo di hasi bo doló. Si bo ta **mi fania** mi no ta kritiká bo, nos ta kapáy di dañá relashonnan di nos famia.

Si bo ta di **mes un partido**, mi no ta kritiká bo, e otro partido lo kere sigur ku nos ta swak i ku nos tin pleito.

Si bo ta etc. etc. Esaki ta un mentalidat di bebí. Mihó nos buska un bruki ku tetero.

HOPI SIGLO PASÁ EUROPA

a pone e hendenan di aki banda traha duru pa nan. Es desir e hendenan di Europa a bira riku ariba e kustia di e Indyannan i e Negronan. Awor Europa ta riku i hopi avansá. E yunan di e hendenan ku a gasta tur nan energia pa drecha Europa, ta sutryendo awor. Nan paisnan (aki den Amerika Sentral i Suramerika) ta atrasá.

Pa kolmo e European awor ta kuminsá bisa ku nos ta atrasá i ku nos ta paisnan pover, loke ta berdat.

Nan ta lubidá di bisa ku nan sí ta riku grasas na nos antepasadonan. Nan ta bisa ku nos no tin basta hende sabí pa yuda nos lugá. Pero e demononan no ta bisa ku nan a obligá nos di tuma i papya nan lenga, ya nos sabyonan ta bay studia serka nan na Europa. I e ora ey nan por hasi uso di nos hendenan sabí ku ta bay studia i keda na Europa.

Europa ta fia nos plaka manera un tata generoso, pero nan ta gana más ku nan a fia, pasobra nos mester paga interés tanto por-

PA SEMPER BO POR SER REKORDA, SORPRESA BO

AMIGONAN Y Mustranan bo mihó deseo ku un

NECHI BUKÉT DI FLOR DI :

BERTHA'S Flowershop

MAINSTREET 26 — SAN NICOLAS

TEL. 5544 — (NA KAS 5524)

syento.

Europa ta regalá nos skol i fligflet etsetera pasobra esey no ta konkurensa pa nan. Pero nan no kyer nos usa e plaka pa traha fábrica di nos mes. No, esey lo trese konkurensya i desy nan no kyer.

Boso por sinti kon desgrasyado i chikadó Europa ta ?

Ku gran pantomina nan ta yuda nos sindikatonan. Pero nan obreronan ta biba bon i gana hopi grasas na nos obreronan. Nan obreronan ta haña partisipashon den e ganashi di nan fábrica. Pero e fábrica por gana grasas na e chambonnan ku mester kumpra nan produktonan ku ta karo aki den Karibe.

Awor aki nos tin Europeanan ku ta duna nos lès. Nan ta bisa ku mestér bini mas Antiyano pa duna lès. Pero ora bini Antiyano, nan ta kik i papya malo di e Antiyanonan.

Nan kyer pa nos kere loke nan ta bisa.. Pero ora Antiyano presentá ku diploma nos ta ripará kon hipokrita nan ta. "Dan komt de aap uit de mouw", Nan stop ku e-koi chambon aki. Antiyano hoben ta puntra un bista nobo ariba tur contesta ku Europa a duna te aw'n dia.

FARSA POLITIKO

Awor aki tin hende ta papya ku masha aplows kende lo bira ministro etsetera. Ya nan ta hinkando rudia pa por gatya abow i sunchi pia di e futuro ekselensyanan.

Tur e makakeria di kore der auto yen di portrèt, gastando ga-

solin i nan pito a yega na su fin.

Awor ku e polítikonan a kaba di lembe nan, awor nan ta bay lembe e polítikonan. Awor ku tempo a yega pa nan ta alerto, nan ta kuminsá pega soño. Tin poko a pega soño y nan ta ronka bay te otro elekshon ora nan ta despert. pa grita : Biba esaki y biba esaya.

Kiko boso ta pensa di e resultado di e elekshon ? Kon e go-byerno mester wordu forma ? Kende mestér manda, kapitalista atrobe of obreronan ? Esnan ku ta karni ni weso ?

Podisé nan a poné un homber preto pa forma kabinèt pasobra nan sa ku e obrero preto di Kòrsow ta hartá di e Kurasoñeñan blankunan ku semper a probechá di nan.

Pero no lubidá ku un homber preto kapitalista no ta mòrs ku e homber preto pover.

Mesun kos nos ta mira na Aruba kon un partido a hiba su lucha Arubano, pero hopi di e Arubianonan riko no ta mòrs ku e obreronan Arubianonan pover.

AKSIKOMITÉ DI ANTIYANO NA ULANDA

Postbus 32, amsterdam
september 1969

Aksikomité di Antiyano na Ulanda ta presentá tur Antiyano ku ta interesá den kambyo di sistema na Antiyano an analisis dje situashon polítiko, ekonomiko i sosial na nos islanan i su kausanan. Hunto ku e analisis aki e ta duna alternativo den forma di un PROGRAMA POLITIKO ISKIERDIS-

TA pa elimina e sistema kapitalista i neo-kolonial ku ta forma e kausanan fundamental di e krisis grandi i profundo ku nos komunidadnan t'aden hopi anja kaba.

Aksikomité ta spera ku e dokumento aki lo stimula diskusjon bow di tur Antiyano na Antiyas i na Ulanda ku ta simpatisa ku e kausa husto di e klasé obreril na nos islanan pa asina yega na un opinion komun a base di nan interesnan kolektivo. Un ideologia komun ta un kondishon necesario pa un pueblo por kambia sistemanan bow di kwal e ta biba.

A N A L I S I S

E krisis grandi i profundo ku nos komunidadnan t'aden ta kausá pa e sistema kapitalista i neo-kolonial ku ta reina na nos islanan. E rebeljon di obreronan na Korsow tabata un kontesta hustifiak riba politiek kapitalista, i anti-sosial ku e empresanan grandi e stranhero tantu komo antiyano a hiba anja'den anja'fo en kolaborashon cu diferente gobiernu antiyano dominá pa grupo di kapitalista, oportunista i elemento antinashonalista.

Konsekwenhanan di e politiek kapitalista, neo-kolonial i anti-sosial aki tabata i ta ainda, entre otro :

MANTENEMENTO I KONTINUASHON DI UN DEPENDENSIA POLITIKO, EKONOMIKO Y KULTURAL grandi i inesesario dor di :

— e areglo ku Ulanda ku yama Statuut van het Koninkrijk der Nederlanden; por, ehemplo e artikulo 43 ta duna gobiernu ulandes e derecho di interveni den asuntunan interior di nos komunidad ku forsa militar, i un konvenio sekreto entre Ulanda i Merka ta apodera Merka di interveni na lugá di Ulanda.

— e asociashon ku Merkado Komun Europeo (EEG) ku ta hasi di nos tera un base for di kwal empresanan grandi europeo ta infiltra den ekonomianan di e.o. Antiyas, Venezuela,

Colombia pa enrikese e klasé di kapitalista na Europa riba kustia di e pueblo.

— dominashon di nos ekonomia pa kompania estranhero en kolaborashon ku kapitalista antiyano.

— e sistema di edukashon ulandes ku ta forsa un identidat europeo riba nos.

— kolaborashon oportunista dje sukcesivo gruponan antiyano na mando ku e interesnan kapitalista estranhero i antiyano na nos islanan.

ENRIKESMENTU I FAVORISASHON DI E OLIGARKIA KAPITALISTA pa medio di :

— un sistema di belasting ku ta altamente na probecho di empresanan grandi i di e katego-

NA NOS NEGOSYANTENAN KRISTYAN I HUDIO :
 "Stima bo próhimo mané bo més"
PARTI BO GANASHI KU BO TRAHADONAN !!!

ria ku entrada ariba di NAF. 25.000 pa anja.

— eksportashon sin limite dor di empresanan grandi dor di kapitalistanan antiyano di e plaka ku nan ta gana dor di paga sweldo abow, kobra prijs halto i ninga di paga provishon sosial.

— Sweldo eskandalosamente halto pa ministronan i otro grupo di funkshonario.

— indoktrinashon i ganjameutu di pueblo ku La Prensa, Beursen Nieuwsberichten, Radio Caribe i Tele-Curacao ku un moda di pensa konformista i tradishonalista.

— limitashon dje derecho konstitushonal di kada Antiyano riba libertad di palabra na radio i television, i opreshon di e forsanan kritiko, anti-kapita-

lista i socialista den nos komunidad.

— 'Show-off' karo i inesesario di e grupo na mando (biaha i representashon)

POBRESA I HUMILIASHON PA E KLASÉ OBRERIL den forma di :

— desempleo di miles di kabes di famia.

— Sweldo di hamber pa obreronan famia (lidernan di Partido Demokrat a propaga sweldo di menos ku un florin pa ora mientras ku nan a alsa sweldonan di ambanarnan bon pagá kaba un bja mas despues di 30 di mei).

— Sweldo minimo absolutamente insuficiente pa biba manera hende.

— kas totalmente inadekwado, esta sin lus elektriko, awa koriente, w.c. pa mas ku 25% di poblashon.

— provishon sosial insuficiente manera onderstand i penshon di bjehe, i aseguro mediko pa kubri gastunan di dokter, botika i hospital.

— edukashon insuficiente pa sinja un ofishi pa hanja trabow satisfaktorio.

(Den nos próximo edisyon nos lo publiká e PROGRAMA POLITIKO di e Aksikomité.)

" T E N S H O N "

(fin)

Mas e tenshon pretele mas Boei ta buska di libra fo'i djé. I parse ku Boei no kyé komplasé. No den nada, pasobra komplasé ta wegá di kapitalismo.

Ta un modo di drey hende su wowo, spesyalmente hende ku no sa mira bon.

No, Boei, kye ta honesto. Honesto pa su kas, pa su amigonan i pa su komunidad, te den su shirishiri.

Pero kon ta hasi si pwelbo i tur e otronan no kye of no por

komprené loke ta Boei su lema'

Peru te ainda Boei no a presisá su lema tampoko. Anto e l'a disidi di pone nan bow otro.

1. "Mi kyer pa pweblo ta 'sina bon informá, pa tur hende sa ta kiko ta pasando den su mesun pais. Anto no solamente pa hendenan "high" o eduká, pero pa un i tur e asunto mestér ta bon spliká. No solamente den tempo di elekshon, pero dia 'den dia afó.
2. Informashonnan mestér ta honesto, no tapamento di wowo.
3. Laga hende adekwado hasi trabao na su kapasidat i no pasobra ku e ta di partido e sa ta kon e trabow ta'.

E otro puntonan Boei a warda pa un otro momento pasobra e no kye pweblo rabya ku né. E por a menta por ehempel e deskriminashon ku e l'a ripará, di hendenan di koló o hendenan ku nomber stranhero. E kaso di lenga maternan na skolnan o den tur aspekto.

O e forma ku e palabra "Lucha di pais" ta wordu interpretá.

Boei ta muchu pa komprende-mento humano. Pa Boei un hende ta hende; E tin mestér di rekono-simiento, respèt, amor i apresyo, ta p'esey Boei mestér bringa pa bondat di tur hende, no pa un partí so.

Atrobe e "tenshon" a lanta. Un sentimento di emoshon, di melan-kolia, un algo masha profundo a toka kurason di Boei. E l'a usa e palabra atrobe. "Kon ku bo biré, un hende ta un hende, maske s'koló, su ideologia, ta otro". 'N ta nèt e kosnan aki ta òna bida va-lor.

Algo a drenta Boei su kabes, anto e di "Peru ta kon e kos ey ta si amí mestér a traha mi mes, lo ta ki tipo lo mi sköhe?"

Peru Boei ta realístiko, e sa ku no t'é a traha su mes i ta parse ku ta ún solushon só tin., esta di loké ku e ta hasi; hasi algo grand-di dje. Por ta di edukashon o negosyo, pero den promé luga sea humano. I tog ta parce ku Boei

PA PAN KU TA DESAROYA PUEBLO

TA PAN DI :

Panaderia del Pueblo

TEL. 1915

GUYABASTRAAT 4, — DAKOTA

ta un idealista, e ta buska kosnan ku ta mustra imposibel..... "Valor di hende sea huma-no?" Boei su palabranan a lagé pasobra manera ku ta úniko mo-da ku "tenshon" por baha.

REAKSHONNAN

SKANDAL DEN EKONOMIA ANTIYANO (2)

Kiko mi ta pensa di ayudo for di Estado Comun Europeo?

Awo pa akлары esaki mi kyer sita algo di "Suriname", kolonie als Rijksdeel". Pa aña 1969 go-byerno di Surinam mestér a pone un kapital di 6 mlyon ariba mesa pa paga rentanan di fyanzanan hasi foi Hulanda, komo miembro di Estado Comun Europeo.

E fyanzanan a wordu hasi pa ehékutá plannan di desaroyo den e añanan anteyor.

Ora ku Hulanda a nenga di anu-lá e pago ariba e rentanan aki (komo-kyera ku e kahero bankaryo nashonal tabata kasi bashi) e go-byerno no di Pngel a wordu de-rumbá direktamente. Mesora tam-be e entrada o pago di empleadon-di di goberno i e pago na esnan sin trabow tabata na peliger.

Peru laga nos preokupa nos mes awo ku Antiyas mes, pasobra Antiyas tambe ta den debe grandi!

Bo sa ku e debe nashonal di An-tiyas na e momento aki ta mas o menos f 162 mlyon.

Goberno Central	f 12 mlyon
Corsow	f 73 mlyon
Aruba	f 77 mlyon

i nos por konklui libremente ku e debenan aki ta keda subi pa e añanan benidero.

A base di algun punto di pro-grama ku mi a tende i lesa du-rante e kampañanan promé ku elekshon ariba Aruba i Corsow mi tin di bisa ku en verdad si nan wordu ehékuta manera e politiko-nan a proklamá anto lo bin algun kambio ariba tereno sosyal den Antiyas. Aunke hopi ta kambio-nan ku meste a wordu ehékuta desde ku Antiyas a haña su awto-nomia na 1954.

Awo mi ta tuma e sigyente kon-klusjon:

Maske ku tur e kambionan aki bini e destino di tur Antiyano lo wordu solamente swavisá, pero e derumbo di nos ekonomia lo wordu anula pa algun aña. Nunka Antiyas lo sali for di e ritmo di fia-plaka i keda paga rentanan helto bèk! Impwesto i presyo di komest-ible lo keda subi i te unda esaki lo yegé? Mi no ta sigi mas den e trante aki, pero no lubidá ku na Aruba tambe tin ku ta bibando den un sitwashon deplorable y ku si bo deskribi esaki tambe bo ta haña un artikulo ku ta konmové i lanta hopi hende foi di soño.

Bale la pena remarká ku Kris-to tambe den su tempo tabata wor-du mirá ku mal wowo pa e fari-zeonan pasobra e tabatá lanta e kapa di skuridat pa hopi hende i hasta nan a krusifiké i maté pa Antiyas relevante.

Peru su palabranan, su morto i su resurekshon a trese salvashon pa tur hende: Blanko, preto; blauw, heel, riko, pover, yong i biew."

Aki mi kyer propone algo lo kwal e artikulo ta trata kardinalmente di dje.

Antiyaas lo no tabata tin mesté di fianzas i regalo di Mercado Comun Europeo i ni di Hulanda si e refinieranan ku kada aña tin un ganashi ekstrabagante tabata kontribuí aktualmente na e entrada nashonal Antiyano !

S. B. POURIER:
(Ta sigi)

Ajera tardi nos a ricibí e promé numero di "FENETA" ku boso a manda nos.

M'a lesé di adilanti te p'atras i mi komentario ta lo siguiente:

Nos ta "soul brothers" en kwan-to nos intenshon di kambia i di hiba nos komunidad adilanti pero parse ku nos ta diferi ideologikamente kaminda boso ta pone ku "nos komunidad mester di hende ku kyer koopera na desaroyo i adelanto di nos islanan, "sin te-ne kwenta ku orihen of ideologia".

Segun mi e "opstelling" aki ta konsekwensja di boso orientashon kultural i psikológiko na promé lugá en bes di polítiko i sosiológiko.

Pa nos por modernisá i integrá nos komunidad nos lo tin ku weta repartishon di poder polítiko na fabor di esnan ku no tin kapital komo e meta of opgetivo ku prioridad mas grandi.

Den e kader aki nos enemigo publiko numero uno no ta tanto Miedo sino Kapitalismo i Neo-Kolonialismo na nos islanan. Sin duda muchu di nos kompatriotanan tin miedo di espresá nan opinion.

Nan lo espresá nan mes mas frekwente asina ku nan sa i sinti ku nan tin un kausa ku ta di nan, manera repartishon di poder i di prosperidat. Nan mester sinja konosé e kausanan struktural di e sitwashon ku nan ta biba 'den pa nan ta motibá pa hiba un lucha pa mehorá nan posishon.

Bringa pa realisá nos identidat na nesaryo, pero kiko nos lo a gana ku un identidat antiyano tanten ku nos ta worde tené dependyenté polítikamente i ekon-

NA NOS NEGOSYANTENAN
KRISTYAN I HUDIO
"Stima bo próhimo mané bo més"
PARTI BO GANASHI KU BO
TRAHADONAN !!

mikamente di Ulanda of Merka : (fweru ku ta dudoso si un dependensia asina ta compatible ku realisashon di un identidat antiyano).

Mi ta rekomendá boso di usa e formula di Vitó pa propagá un aktitud krítiko, anti-konformista i progresista serka nos kompatriotanan na 'Ruba.

A la ves boso lo hasi bon di dediká mas espasio na e relashonnan di klase ku ta manifestá su mes riba tereno ekonómiko, polítiko, (sosyal i kultural). No lubidá ku e kausanan di e miedu ku boso tin na bista ta ekonomiko, i polítiko primeramente.

Nos lo apoya boso esfuerzo pa aktiva nos kompatriotanan pa nan tuma parti den e lucha pa desaroyo autónomo i pa hustisia sosyal na nos islanan ku e medianan ku ta na nos disposishon. "Dit is het begin, wij gaan door met de strijd" mester ta lema di tur Antiyano nashonalista den e fase aktwal di evolushon na nos islanan. Mi ta termina deseando boso eksito ku boso trabow.

ADRIAN MOEN
di aksikomité di antiyano
na Ulanda.

Kiko Abo ta haci

pa Antiyaas ???